

Naqqiut

Akissuteqaat 5. november 2018-imeersoq taarserpaa

Kingusinnerpaamik UKA2019-imi inuussutissarsiornermik siuarsaanermik aaqqissuussinerit maanna ingerlasut nalilersorneqarnerannik Naalakkersuisut saqqummiussinisaat pillugu Inatsisartunut aalajangiiffigisassatut siunnersuut. Nalilersuinerimi aaqqissuussinerit maanna ingerlasut suliffeqarfinnik suliaqarfinnillu nutaanik qanoq annertutigisumik siuarsaanerat qulaajaavigineqassaaq. Nalilersuinermilu namminersorlutik inuussutissarsiortunut manna sinaakktissatut atugassarititat ilanngunneqassapput, maannalu aaqqissuussinernut kiisalu manna tikillugu misilittagaareersut tunuliaqutaralugit sinaakktissanut aaqqiissutaasinnaasunillu pitsanngorsaatinillu siunnersuusiortoqarluni. Nalilersuinermik suliaqarnermi namminersorlutik inuussutissarsiortut qanimut suleqatigineqarnissaannik Naalakkersuisut kaammattorneqarput.
(Inatsisartuni ilaasortaq Múte Bourup Egede, Inuit Ataqatigiit)

Akissuteqaat

(Inuussutissarsiornermut Nukissiuuteqarnermullu Naalakkersuisoq)

Siullermeenera

Naalakkersuisut sinnerlugit inuussutissarsiornermik siuarsaanermik aaqqissuussinerit aamma inuussutissarsiortunut sinaakktissatut atugassarititat nalinginnaasut nalilersorneqarnissaannut siunnersuummut qujassuteqassaanga. Siunnersuummi aallarnerniarneqarpoq manna tikillugu misilittagaareersut tunuliaqutaralugit aaqqiissutaasinnaasunik pitsanngorsaatinillu siunnersuuteqarnissaq.

Soorlu naalakkersuisooqatigiinnermik isumaqatigiisummi allassimasoq partiit naalakkersuisooqatigiittut anguniagaraat nunarput aningaasaqarnikkut imminut napatissinnaalissasoq. Naalakkersuisut anguniarpaat inuussutissarsiutitigit aaqqissuussisimaneq arlariinnik illinilik tunngavigalugu nunatsinni inuussutissarsiorneq inerisarneqassasoq.

Inuussutissarsiorneq ineriartortuaannarnerusoq innuttaasunut pissutsinik pitsaanerusunik pilersitsissaaq aningaasarsiornikkullu ingerlataqarnernik pilersitsilluni, suliffinnik inuiaqatigiinnullu isertitanik pilersitsilluni. Inuussutissarsiornermi sinaakktissat sapinngisamik pitsaanerpaat qularnaarniarlugit Naalakkersuisut inuussutissarsiornermik siuarsaanerup aamma avammut tuniniaanerup siuarsarnissaanut suliniutip sunniutaannik uuttuineq maanna ingerlatilereersimavaat. Sunniutinik uuttuinermut ilaapput Greenland Businessimik, Visit Greenlandimik, Greenland Venturemik aamma Inkubatorordning (isumassarsianik tukertitsivik) SIUA INUvationimik kiffartuussinissamik isumaqatigiissutivut.

Sunniutinik uuttuineq immersugassat atorlugit, annertussutsinik nalunaarsukkat atorlugit aammalu aningaasaqarneq pillugu naatsorsueriaatsit tatigisaasut atorlugit sukumiisumik misissuinerimik annertuumik tunngaveqarpoq minnerunngitsumillu nunatta karsiata kukkunersiuisartui avataaneersut oqaloqatigisarnersigut. Taamaammat sunniutinik uuttuinerup inernerit qajannaatsumik suliamillu paasisimasalinnik toqqammaveqassapput.

Sunniutinik uuttuinermut ilaatigut ilaassapput inuussutissarsiornermik siuarsaanermik aaqqiissuussinerit amerlasuut ullutsinni immikkoortortanut inuussutissarsiornermik siursaaniarnermik ingerlatalinnut assigiinngitsunut avataaniittunut inissinneqarsimasut.

Greenland Businessip inuussutissarsiornermik ingerlatalinnut tapiissuteqartarnermik aaqqiinerit assigiinngiaaqisut amerlasuut neqeroorutissarai. Ukiuni makkunani Greenland Business qinnuteqaatit aatsaat taama amerlatigisut tigusarpai, tamatumalu erseqqissarpaa aaqqiissuussinerit nuannarineqartut. Sunniutinik uuttuinermi inernerit tigussaasut pilersissimasaat malittareqqinneqassapput.

Inuussutissarsiutit siuarsarnissaannut peqataasoq alla pingaartoq tassaavoq Visit Greenland. Visit Greenland nunani tamalaani nittarsaassinerimik ingerlatsisarpoq saqqummersitsivinni aamma isumasioqatigiinnerni aammalu najukkatani aallutaqartut siunnersuinikkut ikorfartortarlugit. Taamaaliornikkut 2012-imiit 2017-imut takornariat nunat allamiut inuit 11.711 missaannik amerleriarsimanerannut tuniseqataasimavoq, takornariat 72.000 missaanniit 84.000 missaannut. Sunniutinik uuttuinerimik ilaatigut isertitat aamma suliffiit tassuuna pilersinneqarsimasut sukumiisumik isiginiarneqassapput.

Greenland Venturep ataani aningaasaliissutit ilaatigut piiaanermik ingerlatsisartunut aamma siuariartornermik pilersitsisarput. Greenland Venturep piiaanermik ingerlatsisartunut aningaasaliissutai nunatsinni inuussutissarsiornermik suliarinnittoqarfiup nutaarluinnaap maanna inerisarluarneqarneranut qularnaareqataasimapput. Aamma aaqqiissuussinerup taassuma qanoq sunniuteqarsimanera uuttorneqassaaq.

Inkubatorordningen (isumassarsianik tukertitsivik) SIUA INUvation inunnut aallarnisaasunngorusuttunut siunnersuinerimik suliaqartuuvoq. Siunnersuisoqartarpoq aallarnisaasut isumassarsiamik piviusunngortinniarnerat oqinneruleqqullugu. Inkubatorordningen (isumassarsianik tukertitsivik) aaqqiissuussaavoq nutaaq 2017-imili ingerlasimasoq.

Aaqqiissuussaag taanna ukiut aappassaata naanerani nalilersorneqassaaq.

Sunniutinik uuttuinerup paasissutissanik pingaartunik tunivaatigut, inuussutissarsiortut toqqammavigisaat qanoq iliornikkut pitsannngorsaavigisinnaanerigut aammalu aaqqiissutissat pisariaqartinneqarnersut. Taamaattumik ukiut tamaasa ingerlanneqartarnissaa pilersaarutigaarput, taamaalilluta tamatta tapiissuteqartarnermik aaqqiinerit qanoq ineriartornersut malinnaavigisinnaassallutigu ingerlajuartumillu aaqqiissuteqarfigisinnaallugit.

Naalackersuisut inuussutissarsiornermik siuarsaanermik aaqqiissuussinerit ingerlajuartumik aaqqiissuteqarfigisarsimavaat piffissamut ineriartornermullu malinnaaqullugit. Siuarsaanermik aaqqiissuussinerit ilaatigut aaqqiissuteqarfigineqarsimapput nalunaarut nr. 14, 27. juni 2016-imeersukkut siuarsaanermik aaqqiissuussinerit taamani atuuttut

nalilersorneqarnerisa kingunerisaannik. Allannngortitsinerit ilaatigut kingunerivaat tapiissutit annertussusissaannik allannguut kiisalu aama branchianut suliffeqarfinnullu immikkut ittunut aningaasat agguagassat immikkoortissinnaaneritut periarfissaqarneq.

Tamatuma saniatigut Naalakkersuisut qallunaat naalagaaffiat suleqatigalugu inuussutissarsiortut allaffissornikkut pisussaaffii pitsanngorsaavigalugillu oqilisaaffigisimavaat. Qitiusumik Suliffeqarfinnik Nalunaarsuiffimmi nalunaarsuisarneq pillugu Inatsisartut inatsisaat nr. 33, 28. november 2016-imeersup kalaallit suliffeqarfiisa NemID atorlugu nalunaarsuinerit nalunaarutillu digitaliusut atornissaa ajornarunnaarsippaa.

Siuarsaanermik aqqissuussinerit atuuttut suli annertusineqassapput qallunaat naalakkersuisuisa aamma Naalakkersuisut akornanni nunatsinni mittarfiliornissanik suliniummi qallunaat peqataanissaat pillugu isumaqatigiissutip kingunerisaanik. Isumaqatigiissutip kingunerisaanik ilaatigut Greenland Vemtoremut aamma Vækstfondenimut 200 mio. kr. aningaasaliissutigineqassapput Kalaallit Nunaanni ataatsimoorussamik aningaasaliiffigisassanut.

Tamatuma saniatigut inuussutissarsiornermut aninngaasat agguagassat 20 mio. kr.-inik amerlassusillit pilersinneqassapput Greenland Vemtorep aamma Vækstfondenip aningaasat taakku iluanni ilaatigut nunatsinni inuussutissarsiornermi suliniutit ilimanaateqarluartut inerisikkartornerisa nukittorsarnissaat siunertaralugu.

Soorlu erseqqissumik takuneqarsinnaasoq Naalakkersuisut inuussutissarsiornikkut pilersitsiniarnerit annertuumik eqqummaariffigalugit sulissutigaa, ingerlaavartumillu suliat naleqqussartarlugit piffissamik malinnaasunngortillugit inuussutissarsiornermilu ineriartorneq tassuunakkut tapersersorlugu.

Taamatut oqaaseqarlunga matuma kingorna Naalakkersuisut sinnerlugit siunnersuut akuerineqassasoq inassutigaa.